

ONDARRETA KO HARRIEKIN EGINDAKO KUDEAKETAREN INGURUKO MOZIOA

Olaia Duarte López EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du Udalbatzan azter dadin. Mozioa 2016ko ekainaren 20ean Gune Publikoen Batzordean aztertutako interpelazioaren ondorioa da.

JUSTIFIKAZIOA

1998. urtetik, hainbat esku hartze egin ditu Donostiako Udalak Ondarretako hondartzan, harriak desagertarazteko. Esku-hartze horiek guztiek gastu ikarragia suposatu dute Udalarentzat eta, bistan dago, ez dira eraginkorrak izan, harriak behin eta berriro atera baitira.

Udalarekin hitzarmena izan eta mundu mailan erreferentea den Azti Tecnalia institutuak 2011eko uztailean egindako txosten teknikoan 2004. urtetik 2011era egin diren lanen laburpena eta balorazioa egiten dira. Bertan aipatzen da urteetan egindako harri eta hondar mugimenduak ez direla egokiak izan eta hondartzaren egoera okertu dutela.

Arazo honi irtenbide bat ematearren, Azti Tecnicaliako profesionalek 2012an iradokizun batzuk egin zizkioten Udal Gobernuari:

- alde batetik, aipatzen da Ondarreta eta Kontxako hondartzek sistema bakarra osatzen dutela eta, hortaz, hondartzetan interbentzioak egiten direnean bi eremuen dinamikan eragina izaten dutela;
- bestetik, hare mugimenduak egiten badira, horrek badiako eremu osoan eragina izaten duela, sistema bakarra delako;
- interbentzio eraginkorrenak zeintzuk diren jakin ahal izateko, Ondarretan neurketa sistema batzuk eta kamerak jartzea gomendatu zuten, hondartzaren morfologia eta dinamika natural zein den ondo aztertzeke.

2012an Udal Gobernuak Aztiko teknikariek esandakoa egin zuen eta egindako neurketei esker hondartza hobeto ezagutzen dugu gaur egun. Aztik egindako azken txostenean, 2015eko ekainean, ondorioztatzen da Ondarretaren azpian 150.000 metro kubiko harri daudela eta hondartzaren oinarria osatzen dutela, harearekin batera. Harri hauez gain, badaude erretiratu beharreko kaskoteak, baina modu antolatuan eta makinaria handia erabili gabe.

Hau guztia jakinda, EAJ eta PSE-EEren Udal Gobernuak Ondarretan harriak atera zituen berriro ere 2015eko uztailean eta abuztuan, teknikarien txostenak eta iradokizunak kontuan izan gabe. Gainera, Udal Gobernuak prentsaren bidez jakinarazi zuen Ondarretan harri-lubeta bat (“escollera”) egitea eta Tenisetik irlarantz doan dikea metro eta erdi gorago jartzeko aukera aztertzen ari zela; interbentzio horrek badia osoaren dinamikan eragina izan lezakeela eta haren paisajea itsas-gorarekin aldaraz lezakeela kontuan hartu gabe.

Hau ikusita, 2015eko abuztuaren 4an, EH Bildu taldeak harriak ateratzeko Kosta Zuzendaritzak eman behar zuen baimenaren kopia eta operazioaren txosten teknikoak eskatu zuen. Nahiz eta, legez, 10 eguneko epea izan erantzuteko, Udal Gobernuak ez du urtebetean inongo dokumenturik helarazi. Berriki jakin dugu Udal Gobernuak Kosta Zuzendaritzaren baimenik gabe egin zituela harri jasoketa haiek. Argi geratu da, beraz, PNV eta PSOE donostiarrei datu hori ezkututzen saiatu zirela iaz.

Bestalde, iraileko udalbatzan EH Bilduk kontrol mozioa aurkeztu zion Udal Gobernuari honako hau eskatuz:

- Ondarretarekin lotutako txosten tekniko guztiak publiko egitea lehenbailehen.
- Azti Tecnicalia Institutuarekin duen lotura kontraktuala dela-eta, teknikoen gomendioak jarraitzea.
- Ondarretako eta badiako morfologia naturala eta paisajea errotik alda dezakeen proiekturik aurrera ez eramatea.

Udal Gobernuak ezezko botoa eman zion mozio honi eta harri jasoketak egiten jarraitu zuen, hiru aldiz gutxienez, teknikarien eta Kosta Zuzendaritzaren oniritzirik gabe.

Aurten, dagoeneko, uda hasi da eta Ondarretako egoerari buruzko kezak iristen hasi dira Udalera. Agerian geratu da, beraz, iazko udako harri jasoketen porrota.

Ekaineko batzordeetan, Miguel Angel Diez jauna interpelatu genuen eta erantzun zuen azterketa bat egiten ari direla hondartzan zer egin behar den jakiteko eta iazko harri jasoketak baimenik gabe egin zirela aitortu zuen -EH Bildu taldeak salatu zuen bezala-, eta Kosta Zuzendaritzatik abisu bat jaso dutela horregatik.

Bestalde, ordezkariak esan zuen Azti Teknikalia institutuarekin Udalak zuen hitzarmena bertan behera gelditu dela eta Aranzadi Zientzia Elkarteak kontratatu dutela ikerketa bat egiteko. Aldi berean, Aranzadi elkarteak Valentziako Unibertsitate Politeknikoa kontratatu omen du ikerketa egin dezan. Zinegotzi ordezkariak adierazi zuen ikerketa honen ondorioak Kosta Zuzendaritzan aurkeztu behar dituztela.

Azaldutako egoera kontuan hartuta, behean sinatzen duen zinegotziak honako **MOZIO** hau aurkezten du:

EH Bildu talde politikoa
Grupo político EH Bildu

Ijentea, 1 - Tel. 943481027 - www.donostia.eus -
20003 Donostia

1. Udaltzarak eskatzen dio Udal Gobernuari publiko egin ditzala Ondarretako egoeraren inguruan Aranzadik egindako ikerketa berriaren ondorioak.
2. Udaltzarak eskatzen dio Udal Gobernuari Ondarretako hondartzan egiten dituen kudeaketak beharrezko baimenekin zein teknikarien oniritziarekin egin ditzala.
3. Udaltzarak eskatzen dio Udal Gobernuari Ondarretan ematen den egoeraren inguruko interbentzio plan integral bat egin dezala, epe luzera begira, hondartzaren morfologia eta ezaugarriak kontuan hartuta.

Donostian, 2016ko ekainaren 24an

Olaia Duarte López
EH Bildu udal taldeko zinegotzia